

CasMarie ta introduci su “Dementie Café CasMarie”

CASMARIE ta un centro di encuentro caminda ta ofrece un pasadia specialisa pa personanan cu demencia, banda di esaki tambe ta conseha y guia e cuidadornan informal di famianan den e aceptacion y cambionan cu ta relaciona cu e malesa. Nan ta brinda e servicionan aki di un forma profesional y cu hopi amor.

September di e aña aki CasMarie ta cumpli 5 aña desde cu el a wordo funda. Den e 5 añanan aki nan a brinda ayudo na diferente famia y nan a desaroya y amplia nan servicionan.

Ta nan placer di por usa e oportunidad aki pa introduci un servicio nobo di CasMarie den e cuido pa cu personanan cu demencia. Nan “Dementie Café CasMarie” a bira un realidad. Meta di “Dementie Café CasMarie” ta pa promove intercambio di informacion y pa facilita con-

tacto entre profesional, persona cu tin un demencia y e cuidador informal, famia.

Cu e anochinan aki nan ta spera cu tur presente lo haya e informacion necesario y sosten pa por sigui brinda e cuido lo mas largo posibel.

Durante di e anochinan aki diferente topico importante y relevante lo wordo treci dilanti dor di invitadonan profesional y cu experiencia den e ramo di demencia. E.o. nan lo informa kico ta e simptomanan di demencia y con por reconoce esaki, kico t’e mihor cos pa haci ora dokter bisa cu e persona tin demencia, posibilidad y preguntanan huridico ora ta trata di demencia, recreacion y actividad pa persona cu demencia, etcetera.

E anochinan di “Dementie Café CasMarie” lo tuma lugar riba tur di 4 diarazon di luna, cuminsando fin di september di e aña aki.

N’e momento aki Pasadia CasMarie ta brinda 3 bez pa siman na clientenan cu un demencia avansa un dia placentero caminda e cliente ta sinti su mes util y caminda e cliente lo wordo stimula, den un dushi ambiente casero.

Nan puntonan di salida ta un trato a base di respet y un programa balansa caminda diferente actividad (fisico, mental, social y recreativo) lo wordo brinda.

N’e grupo di cliente cu tin problemanan leve CasMarie ta brinda riba tur diarazon e Memory Group CasMarie.

Actividad di movecion, estimulacion cognitivo, informacion y un grupo di sosten ta partinan esencial di e servicio aki. Na tur nan cliente y nan famia nan ta brinda sosten individual of sosten pa henter famia, e servicio aki ta wordo brinda dor di psicologo Gyseth Nuesch cu t’e “behandel-

coordinator” di CasMarie.

Tur e servicionan aki menciona tin como meta comun pa enforsa y sostene e persona y su famia. Pero tambe nan por contribui hunto cu e especialista medico pa yega n’e diagnosis corecto.

N’e momento cu e especialista tin pregunta tocante e funcionamiento mental por haci un cita pa un test neuro-psicologico. E test aki lo trece claridad den e puntonan fuerte y e aspectonan menos fuerte di cada “cliente”, p’asina facilita comunicacion y trato pa cu e cliente.

Pronto lo crea oportunidad pa pueblo di Aruba haci uso di e servicio di informacion tocante demencia, nan lo organisa tur siman un momento caminda interesadonan por haci uso di nan literatura (buki, revista etc) y por tira un bista den nan material. Tambe lo por haci pregunta tocante diferente topico

cu ta relaciona cu e malesa di demencia.

Pa tur e actividadnan aki nan ta buscando boluntarionan cu ta motiva pa hunto cu nos forma parti di e team di CasMarie. Si bo persona por tin e tempo y e energia pa duna nan un man, nan kier invita bo cordialmente pa tuma contacto cu CasMarie na telefon: 569-6910 (tur dia di siman) of na telefon: 584-3375 riba dialuna, diamars y diahuebs. Nos ta ofrece na tur nos boluntarionan un curso basico “Con pa brinda sosten ora di Demencia”. Tambe por contribui den e forma di un donacion pa Fundacion CasMarie, por haci esaki via di cuenta di banco RBTT: 42.68.288 Ban duna nos un man y hunto sigui desaroya e cuido y servicio pa personanan cu demencia y nan famia. Hunto nos lo por ofrece un mihor calidad di cuido y bida.